

Pawk dwudnjowsku džělowu rozmołwu přewjedł

Chcedža zaměrnjšo džělać

Budyšin (dk/SN). Čłonojo Serbskeho młodžinskeho towarstwa Pawk su so kónc tydženja přěni króć k dwudnjowskej džělowej rozmołwe w Budyšinje zetkali. Pjatk wječor rozmyslowachu wo tym, z kotrych přičin su jednotliwcy towarstwu přistupili a što chcedža za sebje a za towarstwo docpěć.

Dale zaběrachu so z temami a džělowymi wobłukami, kotrež čłonow zajimuju. Kotry wid ma kóždy wosobinsce a kotre ma zwonkastejacy na towarstwo, bě dalše hesło wuradžowanja. Prašenja to, kotrež wuwabichu mjez přitomnymi čłonami čiču diskusiju. Posledni dnjowy dypk zaběraše so z přichodom Pawka. Wažne je młodostnym, kontakt mjez čłonami w towarstwe samym skrućić. Zdobom žadachu sej wuše zhromadne džěło z młodžinskimi klubami a dalekubłanja.

Sobotu zdžělachu sej młodostni pod nawodom Olivera Schneidera, socialneho džělaćerja a přistajeneho pola Biskopičanskeje džěćaceje a młodžinskeje syće, džělowy plan. Tón wotpowěduje žadanjam a je na předsydstwo přiměrjeny, runje tak za přistajenych a čłonow towarstwa. Schneider wuwědomi přitomnym, zo ma so čestno- a hłownohamtske džěło hišće sylnjšo džělič. Předsydstwo je za džěło na bazy, to rěka z młodostnymi direktnje, zamołwite. Přistajeni maja sej porno tomu nadžělać přehlad wo potrebach we wokrjesu. Z toho slěduja džělowe nadawki a směrnicy. Proces wuwěda a změny, kotryž so w běhu dweju dnjow nastorči, chce Oliver Schneider jako eksterny eksperta dale přewodzeć.